

Inatsisartut suliariaasianni § 37 naapertorlugu Naalakkersuisunut imaattumik apeqquteqaateqas-
saanga:

Naalakkersuisunut apeqquteqaat:

1. Naalakkersuisut "sakkutuulersuisoqarunnaarnissaannik" oqariartuutaat Kangerlussuup mittarfianut qanoq sunniuteqassava?
2. Naalagaaffimmi illersornissaqarfiup Kangerlussuarmi aningaasaliinera Naalakkersuisut isumaqatigaat?
3. Qaqugu Kangerlussuarmi nutarterinerit aallartinneqassappat?
4. Timmisartut mittarfiannik illorsuartaanillu nutarterinissamut piffissalersuineq qanoq isikkoqarpa? Qanorlu amerlatigisunik aningaasartuuteqarfiussasoq naatsorsuutigineqarpa?
5. Naalagaaffiup illersornissaqarfiata Kangerlussuarmi aningaasaliinera ingerlanneqarpa?
6. Qaqugu Kangerlussuarmi sakkutuunngorniarsinnaanerup aallartinneqarnissaa naatsorsuutigineqarpa?
7. Naalakkersuisut "sakkutuulersuisoqarunnaarnissaannik" kissaateqarnerat Pituffimmi sakkutooqarfimmut qanoq sunniuteqassava?
8. Naalakkersuisut suliamut tunngatillugu allanik soqutiginaateqarsinnaasunik nalunaaruteqarsinnaappat?

(Inatsisartunut ilaasortaq, Erik Jensen, Siumut)

Tunngavilersuutit:

Kangerlussuarmi mittarfik nunatsinnut pingaaruteqartuaannartussaasoq kikkut tamarmik nalunngilaat, aamma illersornissakkut ilitsinnik suleqateqarnitsinnut.

Naalakkersuisooqatigiinnissamut isumaqatigiisummi qupp. 16-mi ilaatigut imatut allaqqasoqarpoq "...Erseqqissarusupparpullu nunarput sakkulersorfiussanngitsoq..." Taamatut oqariartuuteqarnerup erseqqissarneqarnissaa pisariaqarpoq, paasiniassagatsigu Naalakkersuisooqatigiit qanoq isumaqarnerat tamanit paasineqarniassammat.

'Sakkulersortoqannginnissaanik' oqariartuuteqarneq imatut paasineqarsinnaavoq pisortatigoortumik ilinniartitaanerup aallartinneqarnissaa aammalu illuutit piareersarneqarnerat maannakkut uninngatikkallalerneqassasut? Naak illuutiniq attartortitsineq suli unitsinneqanngikkalluortoq. Ilanngullugu aamma ersissutigineqarsinnaavoq 'sakkulersortoqannginnissaanik' oqariartorneq mittarfiup iluarsartuunneqarnissaanut aamma sunniuteqarsinnaasoq.

Nunanut allanut Naalakkersuisup islandimiut aqqissuussisimanerat naapertorlugu sakkulersortoqarunnaarnissaanik aammalu amerikamiut siunissami illersuisorilernissaannik oqariartuuteqarpoq,



taava soq Illersornissaqarfik mittarfiup iluarsartuunnissaanut soq aningaasalersuissava – imaluunniit immaqa aperisoqarsinnaavoq Naalackersuisut tamanna akuersissutigisinnaaneraat apeqqutaaginnalerpoq.

Apeqquteqaatima ullut suliffiusut qulit iluanni akineqarnissaat kissaatigaara.